

Dji n'î comprind pus rin !

Dji n' cause nin voltîy politique !
Nos savans bin qu' ça n' mwin.ne nule paut.
Portant, ç' cōp-ci, faut qu'on m' l'èsplique,
Po n' nin passer por on bauyaud.

Dj'a d'mandé à saquants grands maïsses :
« Qu'è pinsez, vos-ôtes, di tot ça ? »
On djoû qu'il èstint bin zèls trêze,
I-gn-a doze qu'ont d'meuré moyas !

Dj'a yeû bau r'toûrner lès gazètes,
Gn-a nin d'dja deûs qu'ont l' minme avis ;
Dj'inme ostant d'mander d' fé risète
À on voleûr qui vint d'yèsse pris !

Vos l' v'loz sawè, mi, ç' qui m' tracasse ?
Faureut qu'on m'èspliquereut dovint
Ç' qui, su nosse bole, i-gn-a one masse
Qui cotchèssenut l' gouvèrnèmint.

Dismètant qu' nos-ôtes, lès p'tits Bèljes,
Dins saquants djoûs, ça frè on-an
Qu' nos d'djans nos pâters po fé crèche
Ci qu'on-z-a sèmé en vôtant.

Èst-ç' qui ça vout dîre qui su l' tête,
Gn-aureut po l' mwins' deûs sôtes di djins ?
Dès cis qu'ont todi stî paupères,
Contints avou à mitan rin ?

Èt d's-ôtes, qui sont près' à cocheûre,
Qu'i n' faut nin prinde po dès bèdots !
Qu'i s' faureut d'dja lèver d' boune eûre
Po lès fé taîre èt s' mète à gngnos ?

« – N'alez nin crwêre qui dès Grands-Omes,
On n'è trove pont dins nosse payis !
À tos lès vôtadjes, on-z-è lome !
Ça djon.neléye pîre qui dès soris.

Nos n' saurin.n' fé qui d' vos rèsponde
Qui nos 'nn'avans tortos plin l' dos !
– Tant qu'à mi, vormint, onk c'èst l'ôte !
Dji m' fou d' zèls come di m' vî saurot.

Tant qu'on l'zî dôrè leû quinzin.ne,
Maugré qu'i n' l'auront nin gangnî,
Vos n'è vièroz nuk qui ça l' jin.ne :
«On fait ç' qu'on pout... ! On-z-a sayî ...!»

- Dès Bèljes, savoz, gn-a d' saquants sôtes
Qui n' sondjenut pus qu'à s' discauser.
 - Tot profitant d' ça, gn-a co d's-ôtes
Qui n' sont v'nus là qu' po l's-èpiler.
- Tot l' minme, i nos rindenut l' manôye,
Tot l' long d' l'anéye, i travayenut !
 - I sont tortos do bwès qui plôye.
Au grand jamais i n' si brouyenut... !»

Gn-a rin d' candjî dispû l' vîye fauve
Qui fieut causer l' leup èt l'agna.
Dji vè qu' c'èst co todi l' minme rauve
Qu'assatche nos sous su l' minme moncia.

Dj'aureu seû ça, dj' sèreu minisse !
Gn-a dès pus bièsses qui mi qu'î sont,
Què l'ont fait toûrner à wachis',
Nosse bia payis, binde di couyons !

Albert Delvaux.
Fèvri 2011.